

Kangilinnguit iluarsartuuteqqinneqarnissaannut kinguartitsinissamik aammalu pisortat neqeroortitsinissaat anguniarlugu suleqatigiissitamik pilersitsisoqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortat Doris Jakobsen aamma Kim Kielsen, Siumut)

Akissuteqaat

(Naalakkersuisut Siulittaasuat)

Siullermeerneqarnera

Naalakkersuisut tunngaviatigut isumaqatigaat maani nunatsinni isumalluutit sapinngisamik pitsaanerpaamik atorneqartariaqarmata, atortulersuutillu atorneqarsinnaasut eqqarsaatigilluaqqaarnagit igiinnarneqartassanngimmata.

Novembarimi 2011-mi Naalakkersuisut Illersornissamut ministeriaqarfik nalunaarfigaat, sakkutooqarfiup ingerlanneqarnissaa eqqarsaatigalugu tigusinermut atatillugu aningaasaqarnikkut pisussaaffinnik pissuteqartumik Namminersorlutik Oqartussat atortulersuutit tiginissaannut periarfissaqanngitsut.

Peqatigitillugu Naalakkersuisut nalunaarutigaat Naalagaaffiup atortulersuutit allanut atugassanngortissinnaagai, tamatuminna Naalagaaffik taamaaliorumassaguni.

Tassunga atatillugu Naalakkersuisut erseqqissarpaat atortulersuutit allanut atugassanngortinneqassanngippata Naalakkersuisut kissaatigigaat tamakku tamakkiisumik peerneqarnissaat. Avatangiisinut pinngortitamullu kusanarnaviannigilaq atortulersuutit asiujartuaartussanngortinneqaannassappata.

Namminersorlutik Oqartussat atortulersuutinik piginnittuunngimmata Namminersorlutik Oqartussat taqqavani atortulersuutit ingerlateqqinneqarnissaannut tamanut ammasumik pisiariumannittussarsiuussisinnaanngillat. Naalagaaffimmi piginnittut kisimi taamaaliorsinnaavoq.

Namminersortut soqutiginnittut taqqavani atortulersuutinik tigusiumassappata, namminersortut soqutiginnittut Naalagaaffillu isumaqatigiissuteqartariaqassapput. Namminersorlutik Oqartussat taamatut isumaqatigiissuteqarnermut aallaaviatigut peqataajumanngillat. Atortulersuutit ingerlateqqinneqarnissaat pillugu namminersortut soqutiginnittut Naalagaaffillu isumaqatigiissuteqassappata, pisariaqarpoq assersuutigalugu avatangiisit illersorneqarnerat aamma nunaminertamik atugassanngortitsinissaq il.il. aamma immaqa kingusinnerusukkut atortulersuutit piiarneqarneranni aningaasartuutit tutsuviginartumik qulakkeerneqarnissaat pillugit malittarisassat atuuttut malillugit Naalakkersuisut taamaaliornissamut akuersissuteqaaqqaarnissaat.

Illersornissamut ministeriaqarfik Naalakkersuisut kaammattorpaat atortulersuutit soqutiginnittunut allanut tunniunneqarnissaannut periarfissaqarnera misissoqullugu –

taamatutaaq pisiariumannittussarsiuussinissamut atortussanik allanillu suliaqaqqullugu. Tassa Naalakkersuisut atortulersuutit ingerlateqqinneqarsinnaanerannut, taamaaliornissaq pimoorullugu soqutigineqassappat sulissutiginneqataaniarnikuupput.

Namminersorlutik Oqartussat susasaqarfimmut Namminersorlutik Oqartussat
piginngisaannut tamanut ammasumik pisiariumannittussarsiuussineq
aallartissinnaanngimmassuk, iluaqutaanaviangilaq taqqassuma ingerlateqqinneqarnissaa
pillugu tamanut ammasumik pisiariumannittussarsiuussinissap aallartinneqarnissaa
siunertaralugu suleqatigiissitaliussagaanni. Taamaammat Naalakkersuisut inassutigissavaat
siunnersuut akuerineqassanngitsoq.